

Kerwered

2004



BUBENHEIM

1,50€

Prolog

Ich grüß eich, ihr liewe Gäscht

un freu mich, dass ihr kumm soin, zu unserm scheene Kerwefescht

Ich hab beim Umzug moi Stimmche net so gequeelt

un alleweil werd se mol gut geehlt.

Do owwe steh ich, es is moi erschdes Johr,

un drah eich e paar Gedichtscher vor.

Iwwer Schandtate will ich eich berichte

un iwver manch annere scheene Geschichte.

Die schlimmschde Sache awwer hun mer gstrich

un soin vun de Wohret ach kaum abgewich.

Awwer ich will net noch mehr Worte verliere,

sondern emol den gute Woi prowiere.

Jetzt kummt unser Sprichelsche, ich hoff er kennen es noch:

DIE BUWERUMER KERB, SIE LEBE HOCH, HOCH, HOCH!

Fensterln mal anders

Wie jedes Johr zu de Faschingszeit,

wird geibt ehr liewe Leit,

Um sich net se blamiere,

muss mer des ganze mol im kleene Kreis präsentiere.

Also die Leit ins Wohnzimmer bugsiert

un bei Kaffee un Kuche des Sticksche vorgefiert

Es hot geklappt un sieht ach noch gut aus,

doch irgendwann brauch mer emol e Paus.

Mit de Kipp in Gosch enaus vor die Deer

de Reschd laaft em annere hinnerher.

Ach de Ledschde kummt schließlich erausgeschoss

und zieht die Hausdeer schwungvoll hinner sich ins Schloss.

„Du hosch doch en Schlissel?“ froht er leider se speet

denn de Hausherr hot schun die Stern in Falte geleht.

Glei gehts los, die Diskussion fangt aa

wie se jetzt kummen an de Schlissel draa.

Es dauert net lang, schun henn se e Idee,

Oaner fahrt haam holt en Schlissel, des kennt geh.

Doch da de Autoschlissel is in de Jack un die im Haus,
wollen se halt arufe die Ossimaus.

Doch da es Handy is in de Jack un die is jo im Haus,
laafts Publikum haam un holt de Ersatzschlissel eraus.

Die annere zwo prowieren derweil irgendwie noisekumme,
damit die Alte net unnötig dun no Haschem brumme.

Frisch gewagt is halb gewunn.

de Oane hot e uffenes Dachfenschder gefunn.

Nor kee Angschd, des hun mer glei,
des Fenschder is uff un do bass ich noi.

Er kummt owwe a un traut net soine Aue,
wie kann mer nor so e klaanes Fenschder do hie baue.

„Solls ich vielleicht prowiere“ herschs vun unne kreische,
„weil ich bin schmärer“, doch er dut net weiche.

Ich bass do dorch, des wär jo e blamasch,

so dick is er ach wiedder net, moin Arsch.

30 uff 30, des kennt e bische eng soi,
am beschde geh ich erschd mol Kopp vor enoi.

Zuerschd die Hand, de Arm hinnerher.

viel weider gings dann ach net mehr.

Gemacht, gedaa, en Zentimeter vor un serick
un dann hot er doch de zwedde Arm dorchgedriggt.

Jetzt bass ich dorch, des kummt hin,
doch dann kummt em soin Disch in de Sinn.

Des Ding jo unnerm Dachfenschder steht,
hoffentlich krie ich en weg, sunschd werd des jetzt bleed.

Geriggt, gedriggt un hie un her,
doch de Disch bewegt sich keen Zentimeter mehr.


5 Minudde später, de Weißkopp drin, de Disch in Stigge,
mer herts nor kreische „du hosch dich jo misse dorch drigge.

Drum lieber Thomas loss der saa:


ich det de Schlissel lieber um de Hals draa.

Weinbau W. Dannenfelser

D-67308 ZELLERTAL 1 · ORTSTEIL HARKHEIM · TEL. (0 63 55) 21 39



Achtung Achtung



Jedes 2. Wochenende im Monat haben wir unsere
Straußwirtschaft
Samstags ab 18 Uhr
und Sonntags ab 15 Uhr
für Sie geöffnet.

Wir freuen uns auf Ihren Besuch.

Der Vorratssammler

Das ich technisch bin net so talentiert,
hun er beschdimmt schun all kapiert.

Un eines schönen Tages dann,
ging moin DVD-Player nimmie an.

Ich hab mer gedenkt „so e Ding is glei repariert!“
un hab mich selwer mol dra prowiert!

Viele Stunne hab ich dra gehange,
awwer diese Teschnik hab ich oifach net verstanne.

No langem hie un her kam ich zu dem Schluss,
dass en neie DVD-Player her muss!

Also hab ich misch in moi Audo gesetzt
un bin zum Elektronikmarkt gefetzt!

Es neie Objekt der Begierde war schnell gefunn,
also hab ich es glei mitgenumm.

De neie Besitz im Gepäck,
will ich dehom glei prüfe, ob er ach dut soin Zweck!

Kaum macht er sich am Abbau vum Alte se schaffe,
dut er plötzlich uff die Stromzufuhr gaffe!

Was er sieht des dut en schogge,
de Stecker vum Alte dut net richtig in de Steckdos hogge!

So en Mischt, des glaabt er net,
so viel Geld umsunschd ausgeb!

Drum lieber Pehl, do kannsche nur driwwer lache,
awwer fer des kansche wenigschdens en DVD-Player-Verleih uffmache!



Wenn's um die Getränke geht...

getränke
meinke

Handels-GmbH
Bahnhofstr. 11 - 67308 Zellertal

06355 - 428

Abholmärkte
Getränke-Shops
Gastronomie- und
Festbelieferung
Heimservice



Wir wünschen allen Besuchern Frohe Kerwetage in Bubenheim!

Ost und West, der kleine Unterschied

Da ich sehr romantisch bin,
fahr ich mit meinem Schatz zur Grenze hin.

Lang hab ich iwwerlehd wie mer so was astelle dut
un eischendlich fand ich moi Worte ganz gut.

Moi Herz hot gekloppt, gezittert hab ich aa
un do hab ich er's oifach gsaa:

„ Hosche Luschn ? “

Moi Gegeiwwer guckt misch verduzt aa
un saat :,, Noa,

do doch net ! “

Bei dere Antwort guckt er ganz verduzt ;
hab **ich** vielleicht die falsche Worte benutzt !?!

Jetzt muss ich se froh, sunschd dut se misch schenne;
,, Willsche disch ab sofort Lebkücher nenne ?!?! “

Sie saht ja un fangt a se groine,
jetzt is se endlich die moine!

De Ich-weß-was-ich-sah-will-awwer-net-jeder-kapierts-Weißkopp

Wer fährt so spät dorch Nacht un Gewitter??

Wie jedes Johr in jedem Ort,
is Kerb un do war en Buwerumer dort.

Er sitzt beim Schisko un drinkt in Ruh,
doch irgendwann macht der ach mol zu.

De Buwerumer denkt sich, mensch des kanns jo net soi,
laafe mer halt nochmol im Jugendraum oi.

Er hockt uff 'em Fahrrad un saat: „Mensch is des dunkel“
dann hört mer nur noch e dumpfes Garagedoorgerumbel.

De Wewwer ruft: „Was issen los moin Buu?“
es kummt zurück: „Ich glaab de Jugendraum hot zu!“

Er hebten uff un hockt en uffs Fahrrad
„Fahr schee uff de Schdroos, denn die is schee braad!“

Unnerwegs denkt er sich, des war kee gudie Idee.
des Ding schwenkt no links un no rechts un dann wars gescheh,
weil dann hot er im Grabe geleh.

Drum lieber Ossi, loss der verzehle,
drink auswärts nimmie so viel, dann musch dich ach Hoamzus net so
quäle




Bubenheimer

Transportgesellschaft mbH

Inhaber Heinrich Weber

- ▶ Ausführung von **Baggerarbeiten**
Von A wie Aushub bis Z wie Zisterne
- ▶ **Transporte** von Baustoffen wie:
Kies, Sand, Schotter, Splitt u. andere



Tel. (06355) 678

Ein Männlein steht im Walde

Wandern das hält jung und vital,
das gilt für Jung und Alt, ganz egal.

Also werd gewannert, ach in unserm scheene Ort,
mer laaft mol noch do un mol noch dort.

Doch irgendwann soin jedem alle Wege bekannt,
drum beschließt de Wannerführer mer fahrt hinaus ins weite Land.

Vor de Hall wollen se sich treffe un warte,
bis se all soin do un mit de Audos kennen starte.

Bevors endlich los geht, werd mol gezehlt
un alle Teilnehmer uff e paar Audos verdehlt.

De Wannerführer beim Eddie mitfahrt,
denn soi Audo steht fer später am Ziel parat.

Die Karawane sich zum Start in Bewegung setzt
un dort dun se warte bis ach kummt de ledschd.

Die Audos wern abgestellt un schun geht's los,
iwwer Stock un Stein un grünes Moos.

Es werd gewannert un ach gelacht
un newebei ach noch de Kreislauf in Schwung gebracht.

Zum Middachesse macht mer mol e langi Paus,
denn no em scheene Esse ruht mer sich aus.

Frisch gestärkt un voller Elan,
setzen se dann zur letzten Etappe an.

Mer laaft weiter, die Erschde werns laad,
das Ende der Strecke, das Ziel, es naht.

Abends, das Ziel ist erreicht, die Wannerung is aus,
die miede Wanderer wollen nach Haus.

Doch die Audos noch am Start dun stehn
un häm will ach käner mer gehn.

Awwer de Wannerführer hot sich so was gedenkt
un soi Audo korz devor schon in die Richtung gelenkt.

Er hot sich was ausgedenkt, denn er is jo net bleed,
mer holen die Audos, eijo des geht.

Des System hot mer vorher schun e paar Mol prowiert,
die Fahrer so in glei zu de Audos schoffiert.

Als er de Schlissel wollt hole eraus,
war er fort; iserm gefalle aus de Dasch eraus?

De Schlissel war fort, was mache mer jetzt?
do geguckt un dort hie gewetzt.

Uff de Such fällt em dann oi,
de Schlissel werd noch beim Eddie im Auto soi.


Doch dann eilt se herbei, die Hilfe in Not,
de Würtz hot sofort en Fahrdienschd agebot.

So haben ses gemacht, dann war alles ok
un naderlich hat de Schlissel beim Eddie im Auto geleh.

Drum lieber Herbert los der saa:

ohne Schlissel kann e Auto net fahrn

Die
Hallengemeinschaft
Bubenheim
grüßt alle Gäste
aus Nah und Fern



**TA RI TA RATATA, TA RI TA RO
TA RI TA RATATA, DIE KERB IS DO!!!**

Die Kunst des alternativen Heilens

In Amerika hot er sich im Basketball proviert
un sich ach glei de Finger demoliert.

Da em es Basketball spiele is net so gelung,
hot er sich uffs Skateboard geschwung.

Ach des zählt net werklich zu soine Talente,
no e paar Minudde war ach diese Fahrt se Ende.

Es war gstolpert un is gefloh
un hat sich schun wiedder de Finger umgeboh.

Krumm un doppelt se dick,
greift er zu em neie Trick.

En Dach später wollen se en Ausflug mache,
also nix wie noi in die Ami-Karre.

In Chicago agekumm,
hänse ach glei en Parkplatz gfunn.

Die Erschd steit aus, des is jo kää Froch,
unsern Held leht die Hand an de Rahme un will hinnenoch.

Schwungvoll schmeist se die Audodeer zu,
en korze Schrei un dann war Ruh.

De Reschd kummt a gestürmt un froht „Was issen basiert?
Hosch du der etwa schun wiedder de Finger demoliert?“

Der arme Kerl, ganz leicheblass,
mäant nor „Ach was, ach was;
nix basiert, im Gegeteil,
ich glaab der Finger is wiedder heil.

Ich män des Ding is zwar noch grün un blau,
awwer ich kann en bewege, ich merks ganz genau!“

De Finger war wiedder ganz, als wär nix basiert,
obwohl er ihn hat sich drei mol demoliert.

Drum lieber Munder loss der saa:

Geh lieber glei zum Arzt, wenn de wiedder bisch in Amerika

Früh schiebt sich.....

Frisch de Lappe, schun geht's los,
kummt er die Gardestros ennunnergeblos!

Die Stros is ferdisch, jetzt muss er was mache
links oder rechts, wohin mit der Karre!?!

Er fahrt links, denn er is jo net bleed,
dann müsst er rückwärts un schun hät er gedreht.

Er steht in de Gass un denkt ach du Schreck,
des kanns jo net gebbe, de Rickwärtsgang is weg!

Er macht un dut un werd schun verrickt,
jetzt hot er bald alle Gäng dorchgedrickt.

Bevor er sich dut noch meh blamiere,
dut er es halt mol annerschd prowiere!

Des Auto muss rickwärts, egal jetzt wie,
vielleicht krieh ich des jo dorch schiewe hie.

Er steigt aus un hoffentlich kriets koaner mit
un schun wird des Auto rickwärts gedrickt!

So hats geklappt, ferdisch mim schiewe,
fers negschde Mol muss er des mim Schalte noch iewe.

Drum lieber Kai, loss der saa
kaaf der e noi Audo, do iss ach en Rickwärtsgang draa.

Wo issen in Kibo de TÜV ?

Beim studiere nemmt ses ganz genau,
awwer bei de Heimatkunde is se net so schlau.

Abi hie, studiere her,
zum TÜV se fahre is schun schwer.

Da es Motorrad zum TÜV hot misse,
hot se oaner gebraucht, der de Weg dut wisse.

Da de Vater hat ke Zeit ,
isse eniwwer zum Nochber geeilt.

Der saat ja, mer fahrn glei los
un des Mädal is vorne weg geblos.

Sie hot sich verfahrn, es Motorad abgewirgt
un sich hie un werrer in de Ausfahrt geirrt.

Dodruf hie fahrt jetzert de Nochber vor,
zum TÜV, serick un wiedder beim Mädal vors Garagedoor.

E halbes Johr später wars dann wiedder so weit,
desmol wars fers Audosche Zeit.

Sie dut zum Begleite de Nochber wiedder froo,
denn vielleicht is de TÜV jo umgezoh.

Desmol hatten se de TÜV gefunne glei,
sie hat ach all ehr Babiere debei.

Sie gebt em Prüfer die Babiere und de ASU Schoi,
der meent, des soi nor en Bericht un der gehert do net noi.

Es Mädels hot en ageguckt un los geleht:

De Baba hot gesaat der Schoi muss do noi un der is net bleed.

Soin sie noch ganz kloar im Kopp,
der Schoi is vun vor zwee Johr, ich kenn moin Job.

Deswege kummen sie jo ach heit do her,
weil sie bekummen en neie vun mer.

Drum liewe Alex loss der saa: TÜV un ASU alle zwee Johr nei,
un mer hoffen du finsch de TÜV beim negschde Mol glei.

Der mit dem Hasen tanzt

Dunkel wars der Mond schien helle,
als ein Auto blitzschnelle
langsam an den Hasen fuhr.

5 Minudde später klingelst an de Wach,
de Polizischd werd ausem Schlof gerisse un saat: „ Guden Tach!

Was wollen se dann, mer hun korz ne de vier;
ich wollt grad aafange mit moim erschde Bier!“

„Ach Gott, ach Gott, mer is was passiert,
ich hab e Häsche mim Auto tuschiert!“

De Polizischd wollt noch soi Biersche drigge
un desweh dut er annere hie schigge.

Mit vollem Karacho, mit Blaulicht un so
düsen se fort un soin ach glei do.

Am Tatort akumm, die Lage gepeilt,
soin se glei zum Opfer geeilt!

Mit grünem Kittel un braune Strapse

dun se halt mol zum Has niwwer schalipse.

Des Mitleid vun dene Polizischde erregt,
iwwelehn se, wie mer so en Has erlegt!

Der Eine wees, do gebts en Trick,
mer schlaat denne Hase mit de Hand ins Gnick.

Am Hinnerlaaf wollt er en nemme,
doch vun dem war nimmie viel se erkenne.

Er denkt sisch, ich prowier des mol annerschder rum,
ich nemm en an de Ohre, ich bin jo net dumm.

En kurze Schlaach, en lange Knall
un de Has is ohne Ohre uff de Boam gefall.

Die Ohre in de Hand, de Has am Lebe,
jetzt muss er ihm de Gnadeschuss gebe.

Er zieht die Waff mit Müh un Not,
de Weißkopp lebt un de Has is tot!

Drum lieber Weißkopp loss der saa,
loss dich blos net aafahre, sunschd bische selwer draa!

Korze

Liewe Alex, dank deines Intensivtrainings kenne ich nun den Weg zum TÜV, doch leider

ist mir das, mit dem alle 2 Jahre auch noch nicht so geläufig.

De Ich-fahr-e-Johr-se-frieh-zum-TÜV-Hebert

Nach meinem letzten Besuch bei McDonalds musste dieser leider renoviert werden.

Die Ich-schitt-moi-ganzi-Cola-dorch-de-Mäces-Jasmin

Wer gibt mir Unterricht in Landeskunde, damit ich nicht mehr über Immesheim nach

Albisheim laufen muss.

De Sorum-isses-kerzer-Jan

Wer schenkt mir einen Terminkalender damit ich weiß, wann ich Geburtstag habe.

De Ich-leg-meinen-Geburtstag-um-eine-Woche-vor-Walter-Seyb

GESUCHT:

Maibäume und freiwillige Helfer, da mein Sohn jetzt schon ein richtiger Charmeur ist.

De Ich-steck-fer-moin-Sohn-Tobias-schun-die-Maibääm-bei-soine-Freundin-Kalli

Wie kann man nur mim Traktor gege e Wand fahre?

In dem mer Samschdags moins, no Freidags owends, die Brems mit em Gas verwechselt.

De Servus-Lui-Scheiße-ewe-hots-gebatscht-Ossi

11880; da werden sie geholfen!

De Ich-bedien-mim-Telefon-de-Fernseher-Ottel

Suche:

Mitglieder für eine interne Bürgerwehr, die jedes Jahr in der Nacht auf den 1. Mai bei der Abschreckung gewisser dunkel und unauffällig gekleideter Gestalten helfen.

Bitte melden sie sich in der Ringstraße bei Hans-Joachim Schmidtke oder

unter www.stoppt-hexennacht.de

Habe Interesse an interner Bürgerwehr!

Unter Umständen wird auch Security bereitgestellt!

Bitte melden unter Chiffre:

1234 hex hex oder bei Guhmann in der Schützenstraße.

Wer gibt mir Nachhilfe in Anatomie?

De Ich-brech-em-Dietsch-die-Rippe-beim-Schmuse-Heppert

Warum sagt mir denn keiner,

dass auch ein Spülkasten eine Dichtung braucht!

De Ich-nemms-ganze-Haus-auseinander-weil-irgendwo-Wasser-herkommt-Serge

Wer will mein Freund sein, damit ich nicht mehr alleine durchs Dannenfelser Wäldchen

laufen muss?

De Schaatzzzzsucher-Maul

Aaaachtuuuunng!!! Baaaum fäällt!!

Ups do war noch die Leiter im Weg.

De Ich-stell-zum-Baam-fälle-die-Leder-a-Gockel

Wollten unsere besondere Freundschaft besonders besiegeln.

Die Mer-trinken-Freundschaft-dorch-die-Bää-un-fallen-um-Mundi-un-Ossi

Blumen BESSAI

67308 Zellertal

Lindenstr. 1 Tel. / Fax 06355 / 460

MODERNE FLORISTIK

DEKORATIONEN

HOCHZEITSFLORISTIK

TRAUERBINDEREI

Epilog

Jetzt kummt des Wort, des jeder kennt,

ehr liewe Leit mehr so in am End.

Mehr hun eiern Humor e bissje uff die Prob gestellt,

was dem ane oder anner net so gefällt.

Awwer wanns eich gfalle hot, lossen eich net lumpe,

mehr kennen e paar Stoincher abpumpe.

Am Schluss wolle mehr „**DANKE**“ saa

an all die henn was zu unserer Kerb beigetraa.

Zum ledschde Mol will ich trinke denn Woi,

aller Mundschenk, schenk mer nochmol oi.

Un zum gude Schluss, ehr kennens alle,


soll moi Gläsje do ennuner falle.

Un wenn dies Glas in meiner Hand nicht zerbricht,

dann wird die ganze Kerwe nichts!

Die Buwerumer Kerb, sie lebe hoch, hoch, hoch!!!

*Vertrauen Sie
Ihrem
Fleischer-Fachgeschäft*



**Metzgerei
Ludwig**

Da weiß man, daß es schmeckt!

Landmetzgerei Ludwig

Inh. Karola Ludwig

Hauptstraße 1
67308 Bubenheim
Tel:06355/558
Fax:06355/960

unsere Leistungen für Sie!!

- ° Fleisch u. Wurstwaren aus eigener Produktion
- ° Partyservice für jeden Anlass
- ° Lieferungen für Vereine und Feste
- ° Qualität und Frische die man schmeckt

unsere Öffnungszeiten:

- ° Die: 9.00 bis 12.00 16.00 bis 19.00
- ° Do : 16.00 bis 19.00
- ° Fr : 9.00 bis 12.00 16.00 bis 19.00
- ° Sa : 8.00 bis 12.00

**Frohe Kerwetage wünscht ihnen ihre
Landmetzgerei Ludwig!!!**